


Oeise Lade 10-2013, p. 62

In salid *rumantsch*

«Tge prendas ti?», dumond jau Guido che sesa visavi a mai e studegia la carta da menu. Igl è sonda saira e nus avain decidì spontanamain dad ir a tschaina. El surri ed jau sai tge che quai signifitga – el prenda ina da sias tratgas preferidas: cordonbleu! Era tar mai na dastga il chaschiel betg mancar e perquai ma decid jau per ils bizochels cun verduras gratinads.



In'emproma
malgarteigiada

Enten spetgar nossas tratgas ma regorda Guido a la suletta giada che jau hai cuschinà a chasa cordonbleus – o tge paupra istorgetta. Jau aveva cumprà duas talgias-vadè e las aveva laschè pretagliar dal mazler, uschia che jau stueva a chasa mo pli las emplenir, panar e brassar. En la teoria tuna quai gea fitg simpel, ma en realitad èsi stà bler pli pretensius che quintà ...

Suenter avair enzuglià il toc chaschiel d'alp en la fletta schambun cotg, plazà il pachetin amez la talgia-vadè e la serrà bain cun in tgiradents, sun jau ma messa vi dal panar. Hmm, tge vegn l'emprim: l'ov u la farina? Jau sun ma decidida per l'ov, quai che n'è tuppamain betg stà la dretga decisiun – la panada na vuleva betg tatgar vi dal toc charn e cun brassar èn er anc ils ultims tochins da la farina da panar sa tatgads vi dal fund da la chazzetta.

Guido ha lura tuttina mangià ils dus cordonbleus, cumbain ch'els eran sitgs sco il tgil dal bau e plitost nairs che bel brins – quai sto esser vaira amur! Tant pli ma legrel jau sin ils tips da cuschinar endretg cordonbleus. E Guido segir era.
Stai bainin!



Angela Schmed